

**Oqaasiliortut Ataatsimiinnerat
Pingasunngornermi oktobarip 27-anni 2010
Ilimmarfimmi Oqaasileriffiup ataatsimiittarfiani.**

Peqataasut: Carl Chr. Olsen, Stephen Heilmann, Eva Møller Thomassen, Abia Abelsen aamma Ellen J.Karlsen

Allatsi: Katti Frederiksen

Oqaluuserisassatut siunnersuutit:

1. Tikilluaqqusineq – siulittaasoq tikilluaqqusivoq.
2. Kingullermik ataatsimiinnermit imaqarniliap akuerineqarnera - akuerineqarpoq.
3. Silhouette kalaallisut (21.09.10)
Oqaasiliortut aalajangiuppaat taaguut silhouette franskit atiannit pisuummat allanngortinnagu taamaatiinnarlugu oqaasersiatut atorneqassasoq, taamaattorli kalaallisut ima nassuiaaserlugu: **tarratut taartoq.**
4. Det Europæiske Union aamma Det Europæiske Fællesskab (22.09.10)
Oqaasiliortut kingullermik ataatsimiinnerannit akissusiarineqartoq atuutiinnassaaq, ilanngullugu CCO-p akissusiaa:

”Union-ilu fællesskabilu tunngaviatigut assigiippat isumaqatigiissutit suut atuunnersut apeqqutaanerusoraara.(ataatsimoortut suleqatigiillu eqqarsaatersuutaasinnaagaluartut maannamut suleqatigiiffik naapertuunnerusinnaavoq ”qasungasumik” peqatigiinnerummat).

EU aaqqissugaanerani apeqqut pingaarluinnartog tassa suverænitetstafgivelse, taanna suverænitet tamakkiisuutinnagu USA-kkutut naalagaaffeqatigiinusinnaanginnamik aamma naalagaaffiit peqatigiinusinnaanginnamik (confederationiunnginnamik), suli suleqatigiiffiusutut isikkoqarpoq.

Union-ip fællesskabilu pineqarnerat danskit sprognævniannut aamma paasiniarneqarsinnaavoq.”
5. På tværs kalaallisut akimortumik?? (07.10.10)
Kalaallisut oqaatsip akimortumik imalt. akimoortumik qallunaatut oqaatsimut tværs-imut atorneqartartup ippigineqarluni saaffiginnissutigineqarnerani ilisimatitsissutigineqassaaq oqaaseq eqqortoq

atugassaq tassaammat 'akimorlugu', - tassani killeqarfiit pineqarlutik.

Taamaattorli atuartitsinermi tværfaglig pineqaraangat kalaallisut taaguut tassaavoq '**atuartitsissutit kattullugit**'.

6. Ledende kalaallisut, ass. ledende socialrådgiver (13.10.10)
Oqaasiliortut siusinnerusukkut aalajangiunnikuuaat atorfiit suussusaat qanorlu suliaasaqarneri tunngavigalugit kalaallisut taaguuserneqartarnissaat, taamaattumik matumani naleqquttuusorineqarpoq oqaaseq '**siuttoq**' imalt. '**qullersaq**', ass. taamaattoqatigiinni siuttoq/qullersaq imalt. X-it siuttuat/qullersaat.
7. Forskningsprojekt kalaallisut (14.10.10) - **ilisimatusaatigalugu suliaq.**
8. Anorrinut taaguutit (16.10.10)
Saaffiginnissut anorrit sakkortussusaannut aalajangersimasunut kalaallisut taaguutigittineqartut pillugit arlalitsigut isumaqatiginartortaqartoq tusaatissatut tiguneqarnera ilisimatitsissutigineqassaaq, ilanngulluguli nalunaarutigineqassalluni '*Anorrit natsimassusiisa taaguutaat naalagaaffiit akuerisaat*' Oqaasiliortunit 1991-imi suliarineqarlunilu akuerineqarsimasoq, aammalu kalaallisuumiit qallunaatumut tuluttuumullu naapertuuttunngorlugit suliarineqarsimasut, atuutiinnassammata.

Naatsumik oqaatigalugu: taaguutit isumaasa imarisaat ujartorneqartut sumiiffinniit sumiiffinnut assigiinngissinnaasarmata Oqaasiliortut akuerisaat tunngaviusumik atorneqaannarnissaat aalajangiusimaneqaannarpoq.
9. Stabsdirektør kalaallisut (20.10.10) – **pisorta qarfirmiut qullersaat**
Stabsfunktion – **pisorta qarfirmi suliffik**
Stabschef – **pisorta qarfirmiut siuttuat**
10. Nunaqarfinni aqutsisut aamma kommunalbestyrelse kalaallisut/danskisut (21.10.10)
Ilisimatitsissutigineqassaaq inatsisitigut allannortut tassatuaammata kalaallisut taaguutit *Inatsisartut* aamma *Naalakkersuisut*, danskisullu aamma taamatut taaneqartassallutik. Kommunalbestyrelse 1950-ikkunnili oqaasersiatut atulersoq sulii ulloq manna tikillugu oqaasersiatut atorparput.
11. 'Beskyttet boliger' - Utoqqaat sapinnginnerusut najugaqarfiata atissaanik siunnersoqqusut (22.10.10)
Pineqartoq '**Utoqqaat najugaqarfii**'-nik taaneqaannartarnissaa siunnersuutigineqarpoq, tassunga immikkoortillugu Utoqqaat Illuat, danskisut alderdomshjemmiusoq.
12. Wellness Center kalaallisut (22.10.10) – **Inuummarissarfik**

13. Ninngarut/nunngarut

Oqaasiliortut ilimagaat oqaaseq ninngarut kukkusumik tutsarliugaagunartoq imalt. eqqaamanerliugaasoq.

Qallunaat nittartagaat arlalissuit kalaallisut oqaaseq *ninngarut* pillugu allataqartartut siumukkakka aallaavigalugit nassuiaataat ataanut ikkuppara:

- *Ninngarut er en benring (samlepunkt). Den fordeler kraften mellem alle hundene foran slæden (via skindreb) til to kraftigere skindreb, til selve slædens fæstepunkter. (www.mandala.dk)*

Uani pineqartoq tassaanerugunarpoq *orseq*, allunaasallu nigarneqartutut ittarput, soorluttaa qamma uani nittartakkami takuneqarsinnaasoq: www.ninngarut.com

Qulaaniittut tunngavigalugit paasinarsivoq oqaatsimik paatsuineq tunngavigalugu *ninngarut* pilersimagunartoq (amma 'qallunaat siutaanniit allataasoq').

nigarpaa => avannaamiusut: ningarpaa*

nigarut => avannaamiusut: ningarut* => ('qallunaap siutaanniit'): ninngarut*

Tamanna tunngaviussappat oqaaseq ninngarut kalaallisut piunngitsoq atulersimavaat, - nunngarutaasinnaanani taanna allatut isumaqarmat.

14. Allat

Allattaaseq pillugu nutaamik siunnersuuteqartoq ilisimatinneqassaaq allattaasitaap atuutilernerani allattaasitoqaaq atorunnaarsinneqanngikkaluartoq (soorlu atini), taamaattoq killiffilersuutit assigiinngitsut allattaasitoqqami atuuttut, (soorlu sivitsuut atuinnaarlugu), allattaasip qanoq allannguuteqarsinnaanera pillugu Erik Holtved 1960-ikkunni isumaliutersornikuusoq.

Ass. taimáitumigdlo = taamaattumillu = tāmātumílu = tāmáttumillu

Tamanna ilisimatitsissutigereerlugu oqaatigineqassaaq allattaasip allanngortinneqarnissaanik Oqaasiliortut pilersaarutiginngimmassuk, aammalu oqaatigineqassalluni allattaasitaap atulermat nutarterneqarnissaanik neriorsuuteqartoqarnikuunngitsoq.

Inussiarnersumik inuulluaqqusilluta
Carl Chr. Olsen
Siulittaasoq

Katti Frederiksen
Allatsi